





1376



秋澗先生大全文集

二一





Centimetres

TIFFEN Color Control Patches


© The Tiffen Company, 2007

Blue Cyan Green Yellow Red Magenta White 3/Color Black





Faint, illegible text visible through the paper, likely bleed-through from the reverse side. The text is arranged in vertical columns and includes characters such as 文, 卷, 第, 八, 十, 三, and 圖.



秋澗先生大全文集卷第八十三

烏臺筆補序

至元改元之五年秋七月憲臺肇建于以配肅天德
用昭太微執法之象

詔前平章政事塔察公爲御史大夫曰中丞曰殿中
侍御史以帖赤木八刺撥灰貳焉曰侍御史曰治書
曰監察御史純用漢人一切事宜率循舊典其裏行
十有二人令各舉所知以充負數侍御史太原高公
乃以相人梁貞前翰林修撰左司都事惲俾膺遊選
方朝廷嚮治思有以重之其監察到臺持


詔

庭見以肅其氣優祿稍以厲其嚴朱衣哀板雖以七

品就列秩望清峻天下事無非所當言者其出使四方佩金符分屬掾馳駟傳中外具瞻凜然聳綉衣直指之望至有恨其崇資不得與之同事者內則彌下臺通論駁設六察畫坊願縱游管小大事月限以數於是騰章抗狀紛番迭作霜逐簡花風聲動臺閣矣僕俛廁裏行頗收薄用比受更九三十有二月尸素既久具藁紛然併以外臺所言一二凡得臺綱書記事狀時務等篇摠一百五十餘章釐爲五卷題之曰烏臺筆補客有覽而謂予者曰昔人諫草往往削而去之子今是舉不幾於自用昭晰以章時事之非乎子曰客何見之晚也裏行言責也人與言雖卑而微其見於此者皆本臺已行底至而不遺者也故書之

策正欲表夫

朝廷寬忌諱重臺諫顧惟莛言曾不少棄見乎微其至可知已至於政貴有恒辭尚體要予雖不敏中或有一得焉是又不可因已陳而廢之也客唯而退於是乎書以爲序



烏臺筆補

監察御史王惲

今呈謹集錄到

御史臺典故條例上自秦漢迄於宋金凡七十三事
逐一開列于左有可行於今者伏乞
鈞覽采擇須至呈者

一古今名號更易

御史大夫秦 大司空漢 大司憲唐

御史府漢 憲臺後漢 蘭臺魏晉

左右肅政臺唐 左右御史臺唐

一負數品從

唐制

卷八十三

三

三

大夫正三品 百官志一員 六典二員 中丞二員 百官志正四 品六典正五

侍御史 百官志六員 從六 六典四員 正六

殿中侍御史 從七 百官志九 六典六員

監察御史正六 百官志十五 員六典十員 錄事二員 從九

金制

大夫一員 從二 中丞一員 從三

侍御史二員 從五 治書侍御史 二員 從六

殿中侍御史二員 正七 監察御史 十三員 正七

典事二員 從七 檢法四員 從八

一三院人數

唐制

臺院

令史七十八人 書令史二十五人

亭長六人 掌固十二人

殿院

令史八人 書令史十八人

察院

計史三十四人 令史十人

掌固十二人

金制

獄丞一員 架閣庫管勾一員

令史一十人 分掌名頭

上臺機密房掌察到應干公事

下臺機密房掌同上臺謂監察糾到

公事申臺

吏戶禮兵刑工房斟酌繁簡分掌

一三院例

一曰臺院其僚曰侍御史呼端公知雜事謂之雜端非知雜者號散端

二曰殿院其僚曰殿中侍御史呼侍御新入者知右巡以次左巡號兩巡使

三曰察院其僚曰監察御史亦呼侍御每公堂會食雜端在南榻主簿在北榻皆

絕笑言

一臺門例

舊曰御史臺在宮闕西南其門北開取陰殺之義

一置獄例

舊臺中無獄有須留問寄禁大理若尋常之獄推訖斷於大理唐李乾祐為大夫請於臺置獄雖按問為便而增鞠獄之弊至開元間御史大夫崔隱甫奏罷之須留問者寄禁大理

一班簿例

治平元年閏五月詔御史臺閣門十日一具細書班簿以進自今大書為冊月上之

一兩臺發使例

舊例兩臺歲發使八人春曰風俗秋曰廉察以四十八條察州縣

一受事例

舊例雙日臺院受事雙日殿院受事

一職官如置

御史大夫秦官位上御銀印青綬掌副貳丞

相其監察御史掌監印

一彈奏進止例

舊例彈奏

皇帝視事日御史奏之景龍後皆先進狀聽進止許

則奏之不許則止

一同詰免獄例

凡為三司同詰三司為御史大夫中書門下

省大事奏裁小事專達

一衣冠例

秦御史冠柱後惠文蓋用鐵為柱取其審固

不撓唐大夫中丞過大事押奏冠法

冠謂呀衣朱衣纁裳白紗中單以彈

之小事常服而已

一大禮例

國有大禮則乘賂車為之前導

一審覆例

若有制使覆案囚徒則刑部參擇之

一三司理事例

則與給事中中書舍人更直於朝堂受表

中丞與皇太子三公相遇例

元魏朝故事中丞出與皇太子分路三公皆
送駐車去頭軛於地以待其過其或
遲違則前驅以赤捧捧之

一六職例

一曰奏彈

二曰三司

三曰西推

四曰東推

東西朝堂

五曰臧贖

六曰理甄

一侍御史五曹例

漢皆用公府掾屬高第者爲之

一曰令曹掌律令

二曰印曹掌刻印

三曰供曹掌齋祠之事

四曰尉曹掌廐馬之事

五曰乘曹掌護駕之事

一新除有罰例

舊例新除者未曉制度有罰至罰有逾萬錢
者若議罰則詢於雜端

一侍御等裏行例

唐龍朔元年置侍御裏行殿中裏行監察裏
行武右文明後顯以裏行名官長安
二年復置內供奉官

一供奉例

舊例掌殿庭供奉之儀式每朝與侍御史隨
仗入位在中丞下給事中中書令後

一持書故事

持書侍御史者本漢宣帝元鳳中因路溫舒

上書宜尚緩刑帝深采覽之季秋清
謝時帝幸宣室齋居而決事令侍御
史二人持書故曰持書侍御史

一四推菘太倉左藏出納例

舊例以殿中侍御史第一人同知東推菘太
倉出納第一人同知西推菘左藏出
納號四推御史

一大朝會例

凡冬至元正大朝會則具服升殿若

白帶郊祀巡省則服從旌門徃來檢
察視其文物之有虧闕則糾之

一銜署例

凡彈劾之事御史言於大夫若遇大事則方

幅奏彈小事則署名而已

一監察不得供奉例

舊例監察正門無籍非因奏事不得入至殿
庭開元間勅並令隨仗而入不得供奉

一監察例

凡冬至祀圓丘夏至祀方丘孟春祈穀季夏

祀明堂季冬祀神州五郊迎氣及享

太廟則二人共監之朝日夕月及祭

社稷孔宣父齊太公蜡百神則一人

率其官屬閱其牲牢省其器服辨其

輕重有不修不敬則劾之

一 會議例

尚書省監司七品已上官會議先牒報臺亦
一人往監若據狀有違及不委議意
而署名者糾彈凡有勅令一御史往
監即監察受命而行亦監其過謬

一 監齋例

凡京都忌齋日則與殿中侍御史分察寺觀
七品已上清官皆顧行香不到則牒
送法司

一 監決囚徒例

凡決囚徒則與中書舍人金吾將監之

一 在京監察例

分知左右巡各察其所巡之內有不法之事
謂左降流移停匿不去及妖訛宿宵

蒲博盜切獄訟冤濫諸州綱典貿易
隱盜賊斂不如法式諸此之類咸舉
按而奏之若不能糾察及故縱蔽匿
者則量其輕重而坐所由御史

一 監察御史雜例

分察百僚巡按郡縣糾視刑獄肅政朝儀朝
廷有不肅欽者御史則糾而劾之每
二人五日分知東西朝堂

一 邊功例

凡將帥戰伐大克殺獲數其俘馘審其功賞

辨其真偽

一門直例

凡自監察御史已上每日一人於本司當門直以檢察臺中出入及令史領詞訟過大夫之事若緣詞訟事須推勘者大夫便委門直御史以推之

一風聞例

舊日御史臺不受訴訟有通詞狀者即於臺門候御史御史徑往門外收采可知
彈者畧其姓名皆云風聞訪知

一相遇例

凡御史以下遇長官於路去戴下馬長官歛

轡止之

一監圍例

舊例蒐狩則監圍察斷絕失禽者

一監選例

舊例吏部將除定員數及擬到州縣付之監察於吏部別置監察一幕御史閱數臨視而已若中間或有資歷先後品從高下及不應等事許授除官陳告御史即推究根因與之改正

進帖例

監察舊例所進帖子止是今呈子樣但內爲腰封其囊上用黃紙作帖黃上書奏

卷之三
十一
帖二字下書臣某謹封

一照刷例

舊例照刷所司先具事日到臺其文卷後粘連刷尾具公事本末赴臺照刷監察御史於正位坐閱朱銷簿臺令史一人任傍亦坐執掌具到事日其當該人負引卷通讀若係算數文卷更設帳科司吏一名與臺令史一同刷磨其中但有違錯稽遲監察將文卷取訖申臺量情治罪餘無違錯者即令大程官於刷尾騎縫近下先用刷訖訖銅墨印然後蓋以監察御史朱印及

於朱銷簿上結尾後亦用刷訖銅墨印

一督軍御史

晉職官志光武建武初征伐四方始權置督軍御史事竟罷東晉孝武太元六年復置隋煬帝時監軍御史

一符節御史

前漢百官表其治書符璽者印綬比二百石以上皆銅印黃綬漢官儀尚璽四人掾史趙堯爲符璽御史尚璽者也晉職官志符節御史秦符璽令之職也漢曰之位次御史中丞掌綬節銅虎

符竹使符及泰始中武帝省併蘭臺
置符節御史掌其事焉

一防禁御史

晉職官志按魏晉官品令又有防禁御史第
七品蘭臺之職也

一漢六條

漢官儀云部刺史周行郡國省察治狀黜陟
能否斷治冤獄以六條問事非條所
問即不省

其一條曰

強宗豪右田宅踰制以強陵弱以衆
暴寡

其二條曰

二千石不奉詔書遵承典制背公向
私旁詔中利侵漁百姓聚斂為奸

其三條曰

二千石不恤疑獄風厲殺人怨則任
刑喜則淫賞煩撻刻暴刺截黎元為
百姓所病山崩石裂詆詳訛言

其四條曰

二千石選舉不平苟阿所愛蔽賢
寵頑

其五條曰

二千石子弟恃怙榮勢請託所監

其六條曰

二千石違公下比阿附豪強通行貨

賂割損政令

一 巡案官選判官支使例

舊例十道巡案則選判官二人為之佐如本

道務繁得量差官人歷清幹者號為

支使

一 巡案出入例

漢監者每三歲一更常十一月奏事三月還

監焉唐巡案使率三月已後出都十

一月終入奏事宰相李嶠請率州置

御史一人以週年為限

一 巡案州縣例

諸監司每歲分上下半年巡案州縣具平反

冤訟案訪利害及薦舉循吏案劾奸

賊以聞

一 案察所部有犯

諸案察官知所部官有犯若事理重者躬親

廉察即民訴訟餘事聽先委不干礙清

強官體究有無實跡結罪保明申所

委官司於案章內明坐所差官體究

到事因並不得出榜召人首告即犯

賊私罪雖已離任被告論或因事彰

露者聽案治

一具發摘過賊吏例

諸案察官每歲終具發摘過賊吏姓名置籍

申尚書省

一巡案許見賓客例

諸監司巡案許接見賓客惟不親謁

一直指使

漢直指使持斧衣繡衣直指者為指事而行無何也此衣繡衣尊寵之也出言好治木獄

一知班受百官及命婦入宮帖子例

舊例百官入朝知班一人於宮門受百官及

命婦入宮帖子其止書其官某職某

爵上用職印令執事人授知班蓋使

知其百官是日有疾病有故者其所

告狀為之曹狀

一知班糾彈例

殿中侍御史下設知班十人如百官朝會知

班四人於四方臨視如有失儀隨簡

者知班向其人前問何姓氏然後具

狀糾彈

一主簿例

隋大業三年始置隋二負唐省一負掌印授

事發辰勾檢稽失及管轄臺中雜務

公廨厨庫檢督令史奴婢配勲散官

職事每食則執黃卷書其譴罰

右呈

至元三年十一月 日

一五使例

謂廊下使入閣監食使監香使掌國忌行香

一使臨時充通謂之五使

三京留司御史臺

元和十三年後但以侍御史殿中侍御史監

察御史共主留務三院御史亦不常

備焉

宋朝西京於分司官內差一員權闕即差官權

掌南京止令留守通判權掌後北京

置臺專差官

天禧四年以翰林學士承旨兵部侍郎知制

誥晁迥為工部尚書集賢院學士判
西京留司御史臺他官止云權而
迥云判者以三品故也

理檢使

宋朝淳化三年置院在宣德門外西北廊鼓

院之西令登聞鼓司進狀人有稱冤

濫沉屈者即引送理檢院審問

登聞鼓院

宋朝鼓在宣德門南街之西廊院在外門西

之北廊舊曰鼓司景德四年五月改

今名九文武臣僚閣門無例通進文

字者諸色人進狀並先經登聞鼓院

除告軍機密事及論訴在京臣僚即
依例實封如進入後審狀有異同虛
妄及夾帶他事並科違制之罪所論
事理重依格勅施行仍令進狀人別
寫劄子節畧要切事件連粘於所進
其餘所進文字並先拆開看詳定奪
或有元本文字照證違牒合屬司分
取索若事合施行及所進利濟有可
觀採便通進若顯有違礙不可施行
即當日內告赤本人知委不識文字
者許陳白帑據所論事件判院官當
面抄劄詣實口詞仍當日據收接到

所進文狀都數逐件開坐行與不行
因依具單狀聞奏若進狀并遇白帑
人稱鼓院看詳不盡情理即許經登
聞檢院進狀披訴仰檢院詳酌事理
若鼓院所定不行爲當即據不行爲
當緣由判押審狀與進狀人收執如
鼓院所定不當即具不當事件并元
進狀繳連進呈其收接所進文狀亦
於當日內具都數開坐行與不行因
依單狀聞奏其披訴人即時判審狀
給付即許於御史臺陳訴其登聞鼓
院檢院委實行遣不當者方得接駕

及繳所判審狀披訴當付所司勘鞠
如披訴得實判鼓檢院官必行朝典
如是虛妄本人科上書詐不實之罪
未經鼓院進狀檢院不得收接未經
檢院不得接駕進狀違者依法科罪

判院官

二人舊以內臣勾當至道三年改用

朝臣

監鼓內符二人
令史一人

登聞檢院

唐置廳

宋朝太平興國九年改廳為檢東延

恩白崇仁南招諫曰思諫西申寃曰
申明北通玄曰招賢改廳院為登聞
院院在宣德門東廊之北景德四年

五月改為登聞檢院是月勅如急速
文字畫時進入常程文字一例每五
日一次於檢院內通進天聖七年上
因讀唐史見匭函達下民寃枉之事
乃謂左右曰天下九州之大豈無寃
枉之人若至京師檢院鼓院理雪者
必是州縣官吏提點刑獄轉運使不
能理雪又若不為申理則赤子無告
矣乃置匭函仍專命御史中丞為理
檢使應諸色人除奇巧法術邪妄干
正道事不得上言及常程公事自依
久來體式令逐處官司并鼓院收接

外如有指陳軍國大事朝政得失大段冤枉累經詎理未獲辨明或事干機密並許詣廳函投進內委是急速文字畫時進入其餘並每五日於檢內進納如無亦具單狀聞奏如檢院進狀人稱寃濫沉屈者畫時引送理檢使審問

判院官一人舊正舍人兼掌淳化二年始命

他官判之

都護府

都護一人掌所統諸蕃慰撫任計戶候安輯蕃人及諸管會司帳勳力地判府事

副都護二人

長史司馬各一人

兵曹各一人餘並不置

射聲校尉

漢掌待詔射聲士工射者冥冥中聞聲射則中之因以名也須待所命而射故曰待詔射聲

戊己校尉

漢元帝初元元年置甲乙丙丁庚辛壬癸皆有正位唯戊己寄治耳此所置校尉亦無常居故取戊己為名一說戊己居中鎮覆四方漢所置校尉亦處城之中撫諸國也

儀車功曹各一人兵曹各一人參軍各一人其安北單于時有司馬倉曹

散騎常侍

騎馬並乘輿車騎而散從無職事也

舊日監察所行

一差監察例本臺且以三人為率本臺備具

本官脚色伴奏日進呈御筆點差假

如首先一人是臺家注意者御筆或

點却次者第三者

一無故入御史臺杖六十搥鼓者先杖八十

一臺諫檢院鼓院臺既立餘皆合行鼓院在

掖門東檢院在掖門之西

一舊來監察照刑止是徹卷看讀但有指澤

即有杖罪如違錯等事更不消說監

繫取招訖送法斷定然後決罰據勾當限次如瘡未愈勾當瘡已愈不出又是罪及照閱朱銷簿

一金國省院臺為三省

一舊有六臺六院

一上下臺大夫中丞為上臺侍御史以下為

下臺

一治書侍御史乃是臺奏事官為制一臺事

一報午時省即起然後臺起六部視臺起然後

後部起

一按察兼運使其意已為按察中間一切欺

隱不公事則不敢犯早辰先與書史

判按察司事次乃與同知副使判運司事

一舊日監察如某吏行止不修及賊濫者監察於本人門或帖子或粉壁書云某人行止如此身事便索發却

一臺有二臺上臺下臺外臺

一舊日監察出使帶牌起驛馬

一監察有急事至撒合門納帖子無問早晚自宮中傳入奉御傳於門娘門娘轉於承御承御聞奏上如熟寢承御直夜者不敢聲言擊所懸之玉為之聲聲既寤進讀其人奏到帖子如此等

事若上即裁決令承御批送省部臺上用小方玉印印之所司得旨登時勾當趁明日朝奏對

一舊日監察外路有体究公事差部官一員并部令吏事得其寘具官取臺吏杖一百已下皆決之若有大段公事臺司覆察得實關所該部分差部官與監察一同致勘如所察不實監察所得罪止是罰俸贖銅

一舊日三品已上官有罪監察体究得申臺呈省聞奏若宣勘本官不問虛實即便承伏如中間實有冤枉令家屬告

登聞檢院不理然後撾鼓以聞

秋澗先生大全文集卷第八十三

秋澗先生大全集卷第八十四

烏臺筆補

彈聊城縣官汚濫事狀

今体察得博州聊城縣周縣尹至元六年冬與部內
良人妻阿曹通奸其秦主簿亦於當年秋前往上口
鎮倉部糧與部民馮化員郎女通奸俱各私下用錢折
合休和了當就問得本路司吏朱勉與所察相同今
來切詳縣尹主簿俱係牧民之官承流宣化肅政風
俗者也今侵犯部民其汚濫非違如此合行糾劾

論中都喪祭禮薄事狀

切惟送終人子之大事今見中都風俗薄惡於喪祭
之禮有亟當糾正者如父母之喪例皆焚燒以為當

然習既成風恬不知痛敗俗傷化無重於此契勘係契丹遺風其在漢民斷不可訓理合禁止以厚薄俗外據除六無問貴賤多破錢物市一切帑作房室侍從車馬等儀物不惟生者虛費於死者寔無所益亦乞一就禁止據此合行具呈

皇太子親政事狀

蓋聞武丁學于甘盤號殷高宗孝宣起於民間為漢今主以唐太視朝以子治觀政世宗東巡以允恭監國斯二君者豈特為元嗣廣聰明達民事而已蓋將正神明之器分夙夜之憂繫臣鄰之心慰億兆之望撫軍監國皆其事也而賈生亦云太子正而天下定矣恭惟 燕王殿下春秋鼎盛孝敬日隆今者守中

令領樞府然首居重器未嘗事事且古之聖人宜莫如舜尚歷試諸難用彰玄德以憚愚慮誠宜早正位號俾躬理庶務仰承黃屋之心俯署青宮之事如每歲春車駕巡幸上都 燕王殿下居守陪京撫臨漢地握一府之樞控百辟之重俾睿智足臨日深治道又念方今 聖天子以仁厚恭儉率先天下而繼體者於稼穡艱難之事又不可不知也不然沿邊將士自較閱以來上下負責不蒙自新雖欲功過相當將何所明若高秋馬肥奉將天威撫巡江漢以之頒犒祿秩赦宥過悞豈特旗幟壁壘精彩一新亦將作士氣揚蠻荆懷遠方安新附復有奮忠竭力建非常之功於目前者矣其爭先快覩謳歌慶幸倍於尋常方

萬也又省記頌者太子合昔又在先朝時已以位號之正判署教條親諭漢官茲非其事與能若是固盤石之基定天下之本計孰大於此者憚職分雖卑猥當言皇國之大事敢冒昧敷陳

彈憚州總管楊庭訓不之任狀

今體察到前博州路總管楊庭訓本官爰自宣州次官陞克河間路總管同知再考授博州路總管於今年七月內祗受宣命虎符克延安府總管

朝廷恩私待以不薄不期錄連保狀輒自獻投以延安為下路欲難其行以少中為稍降妄攀別例一意徵求有虧廉節燕照得之官程限已有定例其揚庭訓自祗受以來經今四月有餘推延事故逗遛不行

恐臣子之分不當如此事屬非違合行糾劾

第二狀

近為延安路總管楊庭訓不赴任事已經具呈未蒙定奪切聞上臺照勘體察本官元行文卷意者豈謂憲司已有先行故遲遲其意却緣憚體訪此事前後月餘總方得實據本臺事理並不知會至於愚見偶與鈞意略同行之似不相妨緣元狀止彈本官為路小官降故違朝命八十餘日不行之官至於自投保狀曾不知愧即係彈章中引據事意本非正情設若在先亦有此等事體未嘗糾彈儻今後更有佞此事同而情理深重者憚等合無其行與否據此合行載呈

論河南行省屯田子粒不實分收與民事狀
會驗河南行中書省咨該去歲屯田子粒一百萬石
內明該屯戶收分語句今體訪得止收到稻穀又馬
料粟通計約四十餘萬石其收分與民數目至今不
曾給付使失業之民二萬三千餘戶往返千里却於
住貫般易糶糧以供朝夕貧者至嚙食草木陳告無
所以致徃徃逃竄至有舉屯全空者切惟屯田大計
當草創之際所宜務遠圖固根本開布恩信撫養新
集導固予之道植久駐之基不務出此將上項子粒
公文明該除數實惠曾不及民使官食前言民有飢
色張虛數以要上知碩小利而斂衆怨既非
國家之便又非持久成大功之遠略也其昧上瞞下

是屬姦欺據此合行糾呈

論河南分作四路事狀

切見河南係邊防重地耕戰之大本所在今
國家用兵江漢開置屯田未其久駐非特取襄陽而
已爲今之計宜分治撫養以實河南根本爲急照得
河南地方寬闊東西二千南北一千餘里跨州連郡
大小七十餘城軍民一十八萬戶雖不及徃時實亡
金一國也今止設總府一道使都轄於上府治又處
北偏東南州郡半與南界犬牙交入如唐鄧徐邳亳
穎等州去京近者五六百里少有緩急其簿書期會
往返交錯首尾相應動輒月餘不惟辦集生受其實
難以控制兼平時與多故事勢不同自攻守襄陽已

來轉輸調度百色所須取辦有司急於星火今而亦
同止轄三兩州者張官置吏一體勾當縱彼人才固
難負荷此特官府之難易耳所可慮者迤南屯田大
復壞散徃徃避役致有畝屯全空者其患在不隸州
府衆人耽悞無有專任責者故也又值蝗旱連年軍
民困苦譬猶群羊數萬被擾不安雖居牧地且乏水
草又令一人看管放牧未見其安且便也以憚愚見
合無將河南地面分作四路以歸德爲一路而徐鄆
宿亳隸之以蔡州爲一路而陳潁睢息隸之以鄧州
爲一路而申裕唐隸之以南京爲一路而鈞許嵩汝
鄭延隸之其選任官吏比之常調增加品秩庶勉勸
事功人爭效用外據所該屯田地而其府官令兼帶

營田使職名於上提點勾當外三路所有屯田戶主
常加存恤將彼此事情互相照料撫養其生業休息
其困乏使一方軍民及居者屯者兩不失所方為稱
職然後限以歲年責其成效以憑考較別議陞降如
此庶得軍民兩安政成化理事無曠慢邊防之重地
既安耕戰之大本又立以攻以守投之所向無不如
意若貪外虛內置已有而不恤圖必爭之要害是猶
荒膏腴之地不為耕稼而求不可治之石田恐切為
鄰人之輕且笑也外據真定平陽兩路亦宜標撥州
縣另立散府使直隸省部管領其於官民亦為兩便
且免夫末大不掉之虞得強幹弱枝之道矣據此合
行具呈

論怯薛歹加散官事狀

切惟自古殿庭之間內而近侍外而宿衛凡有職掌俱帶散階理無一槩白身領宮掖之事者今伏見朝廷一切侍從宿衛怯薛丹等官負多係功臣子孫及歷年深遠辛勤勞績人真據見掌職事就中固分輕重上下終是朝家未曾普覃加帶勲散階號使寵異其身名儻議而行在國家大為恩惠於臣子益勵忠勤且古人有言人主之尊譬如堂群臣如陛階增則堂高是近臣榮顯則人主愈尊崇矣今後合無將內外一切近侍環衛等官據見掌職事依驗色目普加散官如龍虎驃騎金吾奉輔

國昭安懷定

尉之號更

明武將軍之官下至丞昭忠

定奪俸秩為一代新制所謂立制自貴近始昨聞集議官官服色是欲辨上下定民志也據散階事理誠宜先有定奪然後服色可議蓋服色因官品而定而官品由服色而顯也伏乞御史臺照詳

論收訪野史事狀

切惟古者脩史雖野史傳聞不以人廢伏見

國家自中統二年立國史院令學士安藏收訪其事數年已來所得無幾蓋土自成吉思皇帝迄于

先帝以神武削平萬國中間事功不可殫紀近又聞國史院於亡金實錄內採擇肇造事蹟豈非慮有遺忘歟然當間從征諸人所在尚有旁求備訪所獲必

富不然此輩且老將何所聞合無榜示中外不以諸色等人有曾扈從征進凡有記憶事實許所在條件或口為陳說及轉相傳聞事無巨細可以投獻者官給賞有差如此庶望人効衆美國就成書使鴻休盛烈晦而復明備見一代之史碩不盛歎

論品官懸帶弓箭事狀

切見國家往年禁斷弓箭事又弊生中間似有未盡者今體訪得軍戶斡脫弓手打捕回回等人皆得懸帶而外任三品至七品以下官員皆不許懸帶據上項官員重則控制數州小則肅清百里其間懸帶符命赴任在官往返道路緩急有虞無寸刃隻矢以禦強暴是國家命官不若打捕等戶之有備也且此法

之行止能禁絕良民近年所在失事多係挾持弓箭馬賊其擅助賊威奪去民救莫此為甚據外任三品以下官員今後合無照依品官合得舊例定奪俾為長便據此合行具呈

彈甲局首領官張涇影占工役事狀

今體察得中都甲局首領官張外郎至元四年五年影占合造甲人匠劉仲禮私下取要工價銀四十四兩五錢却將本人合造甲數逐作抑令其餘人匠分造了當今就問得張外郎名涇是實據此合行開坐糾呈

為驛程量事緩急給限事狀

切見隨路每歲差遣人負赴都如計稟公事押運差

發課程一切等物者既還心欲速得到家不問鋪馬
生受日行數站其馬死不無走損倒死以憚愚見今
後除軍情急速人負外其餘所差人負合無照依舊
例量事緩急定立性回地程使各站出給閱文於上
分朗書寫日行站數依上走速仍令按察司体究違
者治罪施行如此似望鋪馬少有倒死站案致空受
為典產身良人限滿拚磨事狀

切見在都貧難小民或因事故徃徃於有力之家與
身為隸如長春一宮約三十餘人元納已滿無可償
主致有父子夫婦出限數年身執賤役不能出離又
有親生男女說名典嫁其實元納又火傷風化其
不可長其典產身人如元限已滿無財可贖者今後

合無照依舊例令限外為始以日折庸准筭元錢使
之出離其或典數口內有身故者除其死者一分之
價至於願求衣食者聽外據典嫁不實者乞嚴行禁
止如此不致已久成俗而產身者免轉良為賤混淆
無別不然迷失門戶耽誤差役深為未便合行舉呈
為不宜先浚新城壕塹事狀

切見隨路連年蝗旱百姓飢乏者衆今春首農務將
作大興力役擬浚治新城壕塹不惟妨奪民時切恐
轉致困弊合無伺候秋熟舉作倡為未晚不然若從
重論理合先祭宮城正

宸極之位使內外有限以壯
皇居然後宮室可得而議據浚鑿壕塹工役似未宜

先行

為春水時預期告諭事狀

近知得河間路任丘縣南史村軍戶劉阿李為殘害
海青事將本婦人處斷訖衆詳在先為鷹隼海青公
事然省部欽奉

聖旨通行隨路出榜省諭而農民愚戇月日深遠不
無遺忘兼海青飛舉動輒千里切恐遠方之人不知
係是車駕飛放禽羽以憚愚見今後

御前鷹隼海青合無懸帶記驗如前朝牙牌之制每
遇春秋飛放之時更令所司預期將一切禁忌違犯
之事重行嚴切省諭使農民臨時又得曉然通知如
此豈惟易避難犯亦不致誤有損害似為便當今後

設或復有違犯之人乞送有司照依札撒斷罪施行

秋澗先生大全文集卷第八十四

秋澗先生大全文集卷第八十五

爲運司併入總管府選添官吏事狀

照得隨路總管府自至元元元止是管領民訟差稅而已以故總府州縣徃徃負數不備其或闕負去處多不補差今者已將運司所管酒稅醋稅倉庫院務工匠造作應馬房打捕金銀銅鐵丹粉錫碌茶場窰冶鹽竹等課并與魯諸軍盡行併入各路總管府通行節制管領比之在先職掌事務其繁冗增劇豈止數倍之上所賴用得其人負設必備方可辦集不然將來事有失誤不惟官吏徃被罪戾且以負數不敷爲辭至於都轄上司歲終考課儻無成效切恐不得獨免言責以其愚見即日注擬總管官負理合精選材

均素重強幹有聞清慎明著之人使之統紀於上其
喪老罷輒不職素無政蹟者亦合體究得實量加黜
罰外據總管同知州同府尹以下官員驗部分大小
事務繁簡照依舊例添設員數如總府之治中散府
之推官上中州之觀察節判亦劇縣之特設丞簿是
也其府州司縣首領官吏亦合添設員數分掌案牘
失依上勾當如此庶望上下分職各率其屬
其政則民安事辦不致內外庶務有所曠闕據
具呈

論省部掾內選擇檢法官事狀

見設檢法官多取自州府司吏等人如刑
安某是也且刑部人命所繫法官自非

專門善於其事者察則過於深刻昧者不知所守輕
重高下鮮能適宜其或處心私循唯法是翫尤為利
害兼照得檢法係八品正官亦無州府吏人既非才
選輒用補克者今後合無於省部令吏內選擇知經
史明法律識政體明良公平之人者克偁為相應合
行舉呈

為添設按察司八道事狀

切見四道按察司部內寬遠一出巡按動經半年往
返万里不惟官吏生受其實艱於周察又體知得高
麗島夷小邦尚設按察八道今東寧府內屬鳳州等
郡縣乃一道也况堂堂十万里之大國乎據見設四
道按察司每道合無添作兩道依上勾當寔為便益

論起移懷孟路新民事狀

伏見懷孟新民二千戶大小一萬餘口今將差官分間起移前往中興路安置止恐因而別生事端然狂悖有言者特本管頭目三數人耳今以在官審實有狀罪之可也據中間事情恐小民或不預知此兼等俱係車駕渡江時軍前好投拜人戶前後恩恤十年一旦徙就遠地誠當念慮若万一生事深繫利害且即日春首當國家布德施惠助長生之氣又蝗旱連年所在生受今者迂徙遠去不惟費用浩大經過州縣飲食供頓人兵防送必致搔擾其間更多卒難起移之事而老弱因流離道路困乏疾疫不無死損恐轉傷和氣又非來遠人之道也叅詳莫若分移使實近

裏州郡破散支黨列之編戶一隸有司管領甚為長便

論丞相史公位師保事狀

蓋聞崇德報功聖之盛事尊賢敬老國之常經伏見前中書左丞相平章政事史公其德望素高忠勤兩著比者朝廷以元老勲臣

累聖眷遇詔離重地時錫寵光蓋所以安老臣而崇德業也今史公年雖耳順精力未衰謀猷風彩足以儀刑中外表正群卿而坐鎮雅俗僉謂宜封公爵又聞將歸真定設若允俞不過角巾私第安榮一身耳伏念師保之列久曠其人合無奏聞使居斯位以備論思必能進盡忠言有所廣益也如此不獨盡養老乞言之道抑以激勸人臣罄竭忠盡之節天下幸甚

據此合行具呈

請明國朝姓氏狀

蓋聞自古有國之君皆推原世系以明姓氏如軒轅以有熊為氏帝堯以陶唐為氏夏以姒商以子周以姬亡遼以耶律姓殘金以完顏姓是也伏惟

聖朝奄有區宇六十餘載際天所覆罔不臣屬而又禮文制度粲然一新欽惟

國朝姓氏廣大徽赫遠降自天今輝潛未發無以格悟臣民視聽之願蕪體知得有親散賜姓等氏誠宜區別親疎使貴賤之間各有攸序然後詔誥万方使如日麗天焜耀六合上以接千歲之統下以垂無疆之偉蹟也惟職居言責細大之事似宜敷陳故愚慮

所及不敢少隱

請論定德運狀

蓋聞自古有天下之君莫不應天革命推論五運以明肇造之始如堯以火舜以壬身以金殷周以水木王漢唐以火土王是也據亡金泰和初德運已定臘名服色因之一新今

國家奄有區夏六十餘載而德運之事未嘗議及其於大一統之道似為闕然何則蓋關係國體誠為重事緣只今文治煥興肆

朝章制儀循若德運不先定所王而車服旗幟之色將何所尚矣合無奏聞令中書省與元老大臣及在廷儒者推論講究而詳定之然後詔告方方俾承天

立極之序察然明白寔光揚祖烈貽厥子孫之永圖也
也憚謬當言列無以塞責重大之事敢冒昧敷陳

為中省兩部私使貼書事狀

切見中書省左右部所設掾史其負數足以分務俸
給足以養廉又明注出身定擬資歷是
國家以品官待人未嘗以胥吏相期也所望公勤精
幹躬行所事今則不然私使貼書通知公務每房少
者不下六七人官不係名私有形勢例皆掌按牘主
裁決甚則至於閑節導違開閉侍門泄露事機滋長
奸弊私謁既行公道多廢近者制司偽貼事發此其
驗也重念都省致治之源兩部天官之列建綱立極所
貴肅清以明庶務柰何使幼孺無知之人混淆錯雜

紊煩官紀其為害弊孰甚於此若曰此等吏習而已
事何預焉是中有兩部為童子吏習之所此尤不可
甚者今者積弊有年曾不更張革去冗長欲均至激濁
揚清選擢計密抑吏權謹公道

帝載以之能熙期會至於不失不可得也又照得省
劄行下州郡削減吏冗使有定員本謂省官不若省
事省事不若省吏若此者舍本趨末欲清其流而反
濁其本源也兼舊例私使貼書者律有明禁據中書
省樞密院左右部及隨
朝衙門占候貼書等人合行禁罷

為百官賀正未見私先相賀狀

伏見

國家修習朝儀漸有成法是將表儀萬國肅

正百官為一代之制 燕 朝廷之上禮宜過肅
殿陛之間尊無二上 今者百官賀正趨集

闕下未蒙 陛見私先拜賀 謹呼雜還 倡失無二上
之義合無比 奉朝儀已來 誠勅百僚 革比習俗 庶令
宮庭之間 先致清肅 若大禮一行 隨即可觀 不然限
以門闈 令在內者 不許私賀 以將其肅敬之心 亦禮
治之一端也

為太廟薦新并前障堦垣事狀

伏見 國家建

宗廟奉 祖考歲時饗祭 禮文昭備 今職貢方國 方
物畢至 惟薦新之禮尚闕 而未行 非所以交神明廣
孝思也 又禮下公門 式路馬况 太廟乎 今庶宮正

門前障高堦 據東西外門 即神靈出游之道 使內外
臣民經過者 不知夤畏 趨避為心 又非致敬恭之道
按金制五品以上 官過庶去傘屏人 從疾過六品以
下 並下車馬 合無照依舊例 遵行切詳 二事違闕 至
今誠有司之慢也

為春寒馬牛損傷 課程帶納馬疋事狀

伏見上都路今春雪寒 損傷馬牛 數多 其山東等處
災傷亦然 切惟馬牛 耕戰之本 會驗明有條 禁馬不
得駕拽車 碾牛 得私下宰殺 隨路有司 奉行甚嚴 今
京畿之間 其牛馬 非理用度 甚者 至於駝犁 耕種 公
然屠宰 以為尋常 茲有司之過也 今後犯者 宜加重
論罪 庶望民知畏避 不致日有虛耗 外據各路課程

每季乞約量分數帶納全課馬疋有差就令本道總
府官或次貳一員兼監牧駝各每年終驗孳息數目
考課能否而賞罰之亦漢武帝二千石兼馬政之制
也儻議而行上供

天子之六既下備征進之大舉一旦果用足以收良
壯而振兵威此之倉卒和買或藉取民間不惟人不
被擾抑以減省國用力不勞而辦矣據此合行舉呈

論監司簽事駭劇祿薄狀

伏念官守有常而事分繁簡時制雖寬祿隨品給惟
其加優則心專心顛則事理蓋庶於處已而免喪節
之耻勤於按部而無苟且之虞切見按察司簽事係
隨朝正五品官執掌既繁部分寬遠如刷磨按牘審

鞫刑獄糾正官邪肅清風化勸課農桑體究一切公
事終歲驅馳不離鞍馬其在山北尤為匪易今月給
俸秩止三十貫文寔為鮮薄似難養廉近體訪得隨
路勸農使副定為從五從六資品又所任之事止勸
課而已其品從高下事為繁簡俱與簽事不同今者
祿秩爭懸返加一倍合無比附約量添支使勸來者
以勉事功據此合行舉呈

用曆日銀修祖庭孔廟事狀

切見 聖朝修崇嶽祠緣為國家鎮山與民祈福而
宣聖三綱五常之本君臣父子以之而生成者也其
祖庭殿宇至于闕然攷諸典故皆係歷代有國者所
增修又會驗

哈罕皇帝聖旨節該諸路曆日銀一半修宣聖廟據
東平益都兩路盡數分付襲封修完曲阜本廟合無
欽依 先朝聖訓將隨路及山東兩路銀數併修祖
庭正廟就用洒掃戶以供力役可不勞而辦如此不
惟善繼祖宗之志抑亦尊崇之盛典也

論關陝事宜狀

切見京兆延關陝重鎮其居民大半南駁放良歸順
等戶蕪地負山險其義雍寧峪口皆係南賊出沒道
徑如前年深入華嚴殺掠人民幾犯城郭茲蓋腹心
有應然也又如已獲平陽陳丑勞并本處李顏等詳
其事情正以徂彼前習故勾連內外謀叛歸宗皆其
事也體訪得東連鄭縣西踰義峪其間多有四方作

過避罪逋逃無名等戶聚散山林間十百為群彼負
罪避匿不獲自新小則聚而草切侵害良民重則結
連外境窺伺間便何所不至其陝西官府雖嚮奉

聖旨節文將放良析居交衆等戶令所在招徠未聞
實效况目今蝗旱如此流民不安其行府與總府且
專一選差有餘局官屬多方用心出榜招集懷以恩
信使出離山林安撫存卹限以三年免徵差賦能此
既喜從新又獲其所則前日反仄之心不測之擾可
以求絕矣若因循姑息視為細微上下蔽匿切恐因
而別生事機如華州官司明知如此數百餘戶不行
申報私下隱匿取斂差發足見奉行滅裂不為盡心
曾無實効之明驗也若曰金商已戍茲不復慮消患

未萌古人深戒又照得本路總管已闢三年雖有一
二次官望輕地微恐難鎮服是則分陝之任未得其
人誠不可緩也且早為遴選材德威望素著足以填
撫軍民者以膺重寄庶幾秦隴之間弊政一新狂妄
消弭其元元之民感念恩德知
朝廷雖遠其憂民慮患深至如此孰不慶幸是天下
一臂大得安全矣

曹州禹城縣隸側近州郡事狀

切見曹州所轄禹城縣去本州七百餘里其親管并
投下約四千餘戶一歲之間事為不少如科撥催徵
打算勾集及軍馬詞訟申稟一切事理人吏往還一
千四百餘里其於難易不較可知若官得其人政平

訟理民受其賜苟非其人恃賴上司寫遠不復聞知
凡有剖決鮮不徇情直行其或枉錯使無力小民卒
不能上訴有受臣而已今照得本投下和料拜卷漢
止係千戶功臣之家不同諸王公主駙馬等族人合
無將五戶絲依例分付本投下外據縣司一切事理
就令側近州府節制照管官民俾為兩便其濟州亦
撥到平陰縣五百戶亦請一體定奪施行

為完顏投魯訛欺誑事狀

近見在都咸寧坊人戶完顏投魯訛告稱耶律丞相
於本宅地虛暗井眼內截課銀五百餘錠定既而翻掘
一無所見切詳京師風化之源政今之本一旦信從
小民狂妄至欺誑省堂侵誣大臣動擾人眾知無為

有徵倖方一舉云此風漸不可長兼白晝都城監臨發掘似非平時之事其投魯訛若不痛加懲誡以勵其餘切恐小民因緣別生發端

請百官上

尊號事狀

蓋聞古者天子臨御日久功德昭著百官表上徽號至于再再三鴻惟

聖天子登極以來神功聖德不可殫紀今者宜請中書省恭率內外百司奉表具上

尊號以聞

視朝奏事有常限狀

切以天下之事日有萬機事重而當即行者必須取

自 聖裁宜恭請

皇帝陛下自非歲時巡幸於端居兩宮之時視朝進奏定立常限非惟庶事康理亦使臣下不致稽緩

請建臺閣圖功臣肖像狀

昔兩漢之麒麟雲臺唐金之凌煙衍慶皆所以褒獎忠義激勸一時切見 國朝開創以來謀臣猛將勲德顯著者甚多合無建立畫室閣圖繪肖像不然則使歲時配享廟庭非惟存沒獲寵亦一代之盛事也

立龍封衍聖公事狀

伏見歷代尊禮孔聖世有龍封以奉祀事會驗國朝自壬辰年間欽奉

聖旨於南京取到五十一代孫孔元措赴

闕令襲封於魯自元措之後嗣襲遂闢歲時主祀止
令曲阜令治承權祀事甚非大宗主祭之義我

國家尊師重道焜耀百代三教九流莫不崇奉豈惜
一人爵祿而不議封建蓋未有舉行者合無聞奏明
考族譜令宗親推其賢而有文者襲其封爵俾奉祀
事以明天下風俗之本寔聖代殊常之盛典也

為教孔顏孟子孫事狀

伏見 國朝尊師重道德及後裔其孔顏孟子孫故
往者特設教官使之養育比年以來不聞一人有學
業問望者雖親炙祖庭其淵源聞見終是寡陋今後
有無選三家德性頗明俊者使入京師國學令學士
等官教育庶幾有成以昭先世之德

史丞相封公爵事狀

切見丞相史公係四朝勳臣今雖引年宜加公爵給
其半祿特加體兒以備顧問合無更依舊典每十日
一至中省平章軍國重事不然使卧護諸將規取荆
襄亦周宣憲宗之舉也

請禁制異樣服色事狀

切惟衣服之制本以別貴賤定尊卑故歷代相沿各
有定制今民間以侈靡相高雖工商皂隸皆得衣被
金綉龍鳳衣物以致貴賤混淆無以差別今

國家以儉德化下服服不衷返為效災今後合無將
一切金繡異樣衣物除令得服用外自餘即聽與鞍
轡等事一體嚴行禁制亦辨上下定民志之一端也

論節婦雷姑狀

今体訪到京北府三白渠副使郭時中妻雷氏係前
監察御史雷晞類女自三十一歲夫郭身故雷止生
女子一人長已適元氏經今十有六年窮居守志誓
死靡它真順堅確殊有父風宗族稱賢鄉閭服化在
雷門善繼先聲居郭氏寔爲節婦理宜旌表風勵多
方伏乞御史臺照詳施行

史丞相子格合任用狀

伏念崇德報功聖王之盛事推賢繼世有國之常經
切見前中書左丞相平章政事史公中朝元老累世
勲臣夙夜奉公小心翼翼而又忠孝傳家險夷一節
今行年七十揔戎湘漢御將籌邊衝冒矢石瘴煙暑

雨偃薄侵凌內懷未効之憂外懷敵王之寇用是憂
勞日臻衰疾伏惟

朝廷憫其如此故屢頒


宣賜式慰老懷先之以

御醪藥餌繼之以

內廩乘騾其爲

恩寵固以隆重然史氏一門諸子振振未蒙擢用今
者魯蔡二公之後內外分任各有其人豈期柱石之
元臣未覩簪纓之嗣子據嫡長子格天姿高明達於
爲政前任衛州節使已有能聲後從西征多歷艱險
合無依例任用置彼周行不惟慰史公之心於垂老
之年抑亦激忠風於當代也據此合行舉呈

秋澗先生大全文集卷第八十五



秋澗先生大全集卷第八十六

烏臺筆補

廉平章廉能合復用狀

蓋聞進賢受上賞蔽賢蒙顯戮古今之通論也伏見
中書平章政事廉希憲志誠衛社孝友名家久侍禁
闈常深委仗而又疾惡如讎進賢若渴爰自中統初
年奉將天威仗鉞陝右其奮不顧身殫伏禍亂致
寬西顧之憂而謀猷忠壯蓋素所蓄積也及歸治
裝琴書之外一無長物可謂廉矣既而平章中省前
後七年益勵忠貞之節殊深端揆之方其於贊襄不
為無補邇者罷政就列絙緣新制不聞過愆今也未
及踰年卧病數月生理蕭然恬焉自若雖解律光之

忠亮無他魏高允之清苦自守無以過此誠清白之
相乃有為之材也今年方強仕作未宜置之散地使
後事功方今川蜀未得其人襄陽旅拒不下儻起而
用之使當一面必能收取實効不効則治某以冒妄
之罪誠所甘心焉

乞尚書柴禎地還事狀

切見 雲南王府衛行太部尚書柴禎賦性良能為
人簡重嚮揜西曹殊深雅望久承簡在之恩宜處腹
心之地自居大理將及五年今體訪得 王府既還
無所事事至於彼方上設宣撫下有管民等官仰賴
天威足以填撫其柴禎等一行官吏廿餘人俱不宜
久置遐荒坐老志節使智能之士不得樹功業於明

時誠可惜也迺於奉使張庭珍處問知本官身雖無
恙鬚髮盡白乃心 王室無日不在興言未竟涕泗
交零中外聞者莫不慨嘆昔班定遠哀請臣不敢望
到酒泉得生入玉門關足矣古今雖殊其於臣子戀
關之心一也兼禎母在堂年逾八十使母子形影相
吊於萬里之外又可憫也伏惟
聖朝以孝治天下如禎者儻蒙 矜憫 詔賜北還
如是豈獨不遺材於絕域抑使忠孝之道得兩全於
君親亦激勸臣子之一端也

論高明奔母喪事狀

今體訪得戶部員外郎高明為母訃至已經詣告未
蒙明降輒即奔赴致省堂恠責遂差官馳海青馬前

去追鎖倡欲以違錯加罪為此參詳得若以公廢私
純孝之人難以存處若因孝獲罪使為人子者聞父
母之喪皆不敢奔赴是有司教人以不孝何以法為
唯其兩者之間未有定例使澆薄之徒轉無顧忌孝
行之士愈惑所守照得舊例斬_喪三年者並聽解官
其品官任流外職及吏員司吏諸局分承應人遭喪
卒哭百日令復職願終制者聽聞喪者並聽奔赴今
九諸職官遭父母之喪其有告詣奔赴及願終制者
如抑不從恐傷孝子之心伏乞省部比及通行定奪
已來合無量職務繁簡權宜定制或以卒哭為期或
見新月復職外據自願解官終制之人一從所請兼
憲臺以肅清風俗為首務而古者明王以要道治天

下無重於此據此合行具呈

彈周咬兒羅魏子等事狀

伏見近緣災異減斷囚徒所以詳刑用回和氣故選
差朝官宣明至意審理冤滯惟卹惟欽期于允當今
體察得某人處心殘忍悖法亂行以重為輕當出復
入如滑州周咬兒打死馬大事詳其造意止緣將妻
枉道慮有非為曾不詳審

詔條輒以圖財論殺又驅奴孫佛室并妻羅魏子於
淇州郭家店內同謀親手將本使王二殺死雖佛室
在逃未獲其追會准服已是完備自合依奉

詔條准酌舊例不分首從論決却將羅魏子止同雜
犯決訖四十七下分付本家收管切詳二事既垂寬

大之恩尤先重輕之義足見處心邪枉悖法亂行非
唯返戾天地之和氣使寃寃鬼苦生死兩傷胡可追
悔據逐節事理大厲違枉合行彈劾乞依法論罪以
慰死者

論左丞許公退位奏狀

臣聞賢者化之本雲者雨之具得賢而不用猶久陰
而不雨也伏惟中書省禮樂刑政紀綱號令之所出
誠朝廷之大柄中外之繫望也丞轄之位不宜用
匪其人使曠天職伏見左丞許公衡師心大學養氣
至剛獨立危言清苦自守挺然有蹇蹇匪躬之操方
之古人不可多得且自立中省迄今十有二年前後
相臣如鴛鴦盡者多矣未若許之切直敢言不以榮

貴爲心者本官正以遭不世之遇當有爲之時十餘
年間恩禮隆重爰自布衣擢置相位計其初心有盡
率報國而已然自輔政已來雖中間有所建明未聞
以次施行者以謂處任重責深之地無涓埃補報之
功夙夜思惟自慙焉用是憂惶疾日增劇今者恐久
妨賢路故卧病不出哀懇未退至于再三揆度其情
恐不特血氣爲病耳伏惟

皇帝陛下聖智天臨明燭萬理求治之心亟若飢渴
一旦得臣如此夫復何求且君聖則臣直虎嘯則風
冽氣所感召理之固然若是則國家之福天下之
幸也如左丞許公者伏乞時加體貌置彼論思疾使
展盡底蘊以答恩私其於謀王體斷國論必能進

盡忠言有所廣益以慰中外之望誠未宜聽其去位以塞忠諫之路也臣職當言責觸冒忌諱惟

陛下

留神省察

論司獄官合行條理事狀

伏見比者隨路設置司獄官三十余員其品與祿不為微薄足見朝廷重惜人命哀矜疾獄之至意也又照得省部即日以五事考課親民官政治能否獨不見降到獄官合行條件切恐中間不為用心勾當有名無實緣狴犴之間人命所繫若未經鞠問及抵法以前或因病失所非理死傷其間縱有冤濫當宥之人胡可追悔此與殺之何殊檢會故典漢宣帝地節四年詔曰今繫囚或以笞掠及飢寒瘐死獄中

者朕甚痛焉其令郡國歲上繫囚若笞掠及瘐死者

丞相御史課殿取以聞今卑職叅詳隨路輕重罪囚

一歲中不下常有五七百人且冬夏二季又為苦月

其或溫涼失所飲食非時藥不當病非理死傷者固

亦不少今獄官雖備恐只以無合行條令罔知所恤

不過囹圄約束卒吏死致踈虞而已如此是與

朝廷矜恤至意大相乖違徒月費俸鈔養閑人資歷

也此與不設何異以某愚見今後兩省宜酌古往今

講究獄官合行條件使知所守定為格例付下各路

施行如本官任滿日仰總管有以憑考較優劣復令

按察司體察相同申臺呈省用之陞黜以表能否庶

望獄官任內盡心勾當不致非理囚禁因循損傷人

命

命上以副

朝廷哀矜至意下以感召陰陽之和以消災盪之氣亦 聖代善政之一端也外據因糧鑿藥燒燠窠篋等物所在官司須管按月依例給付却不得因而致有闕乏據此合行具呈

太廟行禮發晏事狀

切惟祭禮以嚴敬為主兼質明行事清朝而徹古今之通禮也伏見今歲 太宮大祀自十七日夜二更已來行禮至明日辰時終方罷徹計其漏刻幾于一日以致老者不勝其疲壯者委頓于地所謂有司跛倚臨事雖有強力之容肅敬之心因倦怠而不存于中矣且祭而忘敬鐘鼓玉帛似為虛陳彼執事者却因

怠矣儀從而得罪是又不可甚矣恭詳合無將見行禮文令尚書禮部與太常寺官重行講議中間節文輕重升降遲速因仍損益使各得攸宜以新一代之典永為定例則禮容精意兩有餘裕顧不盛歎據此合行具呈

乞權免大名等路今秋帶納中都遠倉脚

錢糧事狀

切見大名彰德衛輝懷孟等路蝗旱連年闕食者衆 啓啓告困至今不絕即日又令五路百姓起運官糧千萬餘石限十一月終赴新城交納每石雖官支脚價二兩二錢其定難以繳計據各路所該糧數官司盡行椿配民間轉令顧脚般載今體訪得每石不下

五兩有餘才方可運一石兼大河以南千里蕭條人煙斷絕人牛車仗冬月寒苦至於糶糧芻料又須負戴往返三千餘里其間生受姑置不問而近倉稅石及帶納中都遠倉脚錢糧數亦依常例三限管得依期閉納如此督迫人難何以聊生參詳上項事理除官支脚錢外每石百姓又費二兩有餘今畧舉大名見運四萬五千餘石扣算據百姓餘上所費二兩之數且該米兩石為率是使百姓已納十三萬石到官比附本路遠倉脚錢糧數四萬九千餘石已出一倍之上今者更要百姓帶納之數委是重併以其愚見合無將今歲五路帶納遠倉脚錢稅糧權行蠲免外據近倉稅石更為寬展限次送納且令百姓併力以

供新城陸運庶優於辦集且兵法有云國之貧於師者遠輸遠輸則百姓貧由此而觀當國計者誠宜深思遠慮念遠輸之勞傷百姓之困使民力有餘不致展轉靠損貧乏似為便當

舉崔國華充省掾狀

切見樞密院前官吏人等往往以貪墨敗黜其令史崔國華者練習吏事通曉譯言既慎所守又以能聞自照剗來隨房例有違錯而國華無事經問者其掌行簿牘精詳舉皆可觀切詳身居吏職能自振索夙夜在公罔累所舉體理宜加異以勸方來合無將崔國華轉補省掾儻試諸難可收實効非唯於廉汚之間黜陟並行抑亦明公道而勉事功也

論明經保舉等科目狀

今體訪尚書省批送禮部同翰林院官講議科舉事
省擬將詞賦罷黜上用經義明經等科其舉子須品
官保舉之人然後許試夫如是恐事出非常中外失
望切惟科舉之法上自隋唐迄于宋金數百年之間
千萬人之衆講究亦云詳矣如餘科或廢獨賦義策
論取士而不去者蓋以經史道備格律精當至公無
私而又可常故也故前人之目為將相科如宋之韓范
歐富金之高石侯胥皆其選也其保舉在宋諸公雖
曾建議令官舉歲貢以三百年尚文之世尚莫能行
况權輿於今日乎參詳若依上項所擬將見公道掃
地關節大行上下成風相率諛偽其弊有不可勝言

者矣且品流之人若果實人材雖出一切科目不害
為通使特達之士何獨詞賦無益於學者治道哉至
明經設科正使天下之人舍精就簡去難從易不出
手抄義疏口誦集解心熟箋注其規模不出帖經口
試死童子答默義之法耳至有兀兀窮年白首一經
餘不暇及者必欲絕去筌蹄斷以己意使微辭奧意
超越於道學諸儒之上亦已難矣由是而觀返不若
賦義之淹貫經史扣擊諸子辭理文彩兼備之為愈
也故唐人有進士百一二明經十二三之謔宋人亦
云焚香禮進士撒幕待經生足見經生為易而進士
為貴為難矣此王安石所以創經義而革明經之弊
且泛也外據保舉等事論者不過士不官舉雖盜賊

倡優皆得舉進士則賢不肖渾殺無以別矣曾不念
亡金舉法如十惡倡優奸盜充吏犯賊至徒等人明
有結罪條理儻舉而行如其詳密可也不然則草野
遺賢閭閻寒餒終身陸沉不復進用於明時矣且以
故事考之又有甚可慮者昔唐揚國忠子楊暄舉明
經科學術荒陋文不中格禮部侍郎達奚珣畏國忠
權勢遣其子先白國忠云郎君所試不中程文然亦
不敢落也又楊汝士與錢徽掌貢舉改文昌李紳各
以書屬所善進士於徽及榜出文昌紳所屬皆不預
焉及第者裴度之子李宗閔之壻楊汝士之弟或曰
今歲取士不公皆子弟無藝以關節得之 上命
王起覆後試果黜十餘人歟錢徽宗閔汝士由是而

觀其明經保舉亦有未便於時者茲非明驗歟以某
愚見其詞賦宜公然集議不可遽去其保舉之法恐
行不克終徒爲紛紜之變耳當今之務惟以多得人
材以備任用爲急據科目之先後人材之速得已經
具呈

建國統事狀

伏見自古有天下之君莫不皆建國統以明肇基之
始方今元雖紀而統未立蓋未有舉行之者是大闕
然欽惟

聖朝統接三五以堂堂數萬里之區宇垂六十年大
統未建何以威仰万方昭示後世愚以謂國之稱
宜下公卿大臣及五品以上官集議闕下則天下

幸甚

彈西夏中興路按察使高智耀不當狀

切惟按察司所行輕則彈劾奸邪重則抑按暴亂爲使者務要剛明知體臨事有爲故風移所加百城震肅今體察得西夏中興路提刑按察使高智耀資性罷軟不聞有爲事佛敬僧迺其所樂迹其心行一有髮僧耳既乏風憲之材難處搏擊之任兼河西土俗太半僧祇初聞智耀來官已爲望風輕易故理任已來所行淹阻畧不見憚欲望宣明教化問民疾苦鎮靜一道難矣哉如近者習良和尚等事比其驗也合無別選材能以代厥職不然雖復別有區處既非其人恐終不能震疊不惟虧損朝廷威重使

五郡冤抑之民一經赴訴彼強暴者加怨前時而平民轉罹殃咎其或使之強爲因而別生事端尤爲未便叅詳至此擇人而代佯不宜緩據此合行糾呈

論立睦親府事狀

書云平章百姓以親九族此帝堯致治之先務也今國家聖子神孫碩大蕃衍維城維藩固若盤石宜請立睦親府選懿親中尊王之賢重者一人判大宗正事使之敦睦宗屬奉承王命庶幾於變時雍民德歸厚矣

論屯田五利事狀

南北之勢我可以取彼此必然理也然饋餉轉輸古無良法正有屯田待以歲月爲古今上策耳

朝廷往年已曾施行不數年積穀幾至百萬若行至
于今其利有不勝計者蓋兵足食民無轉輸之勞邊
有備官無和采之弊兼自古議征不庭莫不留兵在
田而後收必勝之道今者宋人出沒不時止恃山林
阻隘雖云深入如涉虛境今者如復令邊民分地雜
耕上自鈞化下至蔡息不數年剪去荒惡蕩爲耕野
一利也民則什什伍伍相望三時種藝甲兵在傍彼
欲內寇野戰實非所長復欲伺便鼠竊又無潛伏出
入之便而復嚴烽燧謹斥候少有警急我則收合餘
力據守要害而似前日之寇盜不可得矣彼縱來寇
如獸處平野獵者蹙而殺之獲之無不利矣二利也
至於我軍在進適當農隙丁力有餘者許隨大軍入討

所獲悉付本人是民因私利勇於公闔三利也又令
向裏一切蒙古奧魯亦編問民屯使之雜耕不惟調
習水土可使久居且免每歲疲於奔命之役四利也
不數年根勢深固使奧魯軍人倒營南下近則雜兩
淮之間遠則抵大江之北所謂長江之險我與共之
矣五利也合無將河南舊有屯田戶計及一切沿邊
之民盡折絲銀使之輸穀其屯事於山川出沒要害
去處首爲耕墾官給牛畜自辦農具其條法且一依
經畧司元行然後選近侍爲司農官及內設屯田
郎中員外專領其事使通其奏請趣其應副歲時令
按察司或督軍御史按行屯所察其成否而賞罰之
不數年田事可成坐收必勝之道矣

論百官集議事狀

朝廷大事有疑侶未決者當下百官集議蠲事置大
夫專掌議論自兩府大臣博士已下皆得預議以伸
已見不嫌以卑抗尊既盡其衆之所欲言然後附以
人主之獨斷此漢集議有公天下之意也方今品式
未完法制未定事有可行而疑侶者宜遵漢故事五
品以上官集議

闕下各具所見以聞

論宰相兼判兩部事狀

今者吏刑二部官備吏具專一分治是
朝廷委任既專且重切見比年以來選法不定刑名
無章黜陟遠近多徇私情輕重死生致傷和氣宜考

定新制使宰相兼判兩部以責成効

論立群牧所事狀

伏見古者將帥以大司馬爲官蓋兵以馬爲本今冀
土雖馬之所出然國朝馬政未遑修舉輿臺皂隸
皆得乘騎駕車拽碾無不駟用一歲之中消耗不少
往年雖有禁令旋復寬弛甚非強兵之道也宜養之
有素立群牧官略取唐制以定牧產之法再嚴先禁
用壯兵威

論官買輝竹事狀

切見衛輝路民竹緣三十年前百姓培養以至今日
俱係軍民站戶倚仰當差兼已亦數重宣課近年官
定四六抽分其實中半曩者園戶訴難雖蒙上司定

奪經今二年未獲明降其竹因斫伐不時往往枯死
若以竹論通合官拘如曰物力與桑麻無異又與懷
孟事體不同據園畝不過四十餘頃宜買厲官竹使
民无求業之思官有通行之利亦便民之一端也

論塞絕沁水事狀

切見今年雨水稍作黃沁北沒决壞武陟縣埧閘北
與御河合流淇門以下槽岸低狹不能吞伏幸不為
患兼今日隄防未修儻值雨潦大作自衛已東非惟
漂没田廬鹽場所在有大可慮者以其愚見將元修
閘堰宜塞絕之使無後患嘗聞衛土人云金太定二
十七年黃沁北沒潦没州城水至浮圖第一級此先
事之驗也

論范陽種麥事狀

切見附京地寒不可以麥而歲用不啻幾萬斛止仰
御河上下商販以資京畿今范陽去都百里而遠土
風宜麥與稻比之秋田宜令倍種外據荒閑冒占復
許諸人開耕驗頃畝免地租三年及減半力役亦完
實內地之道地關中古無麥今盛於天下者盖自武
帝始也其種稻事昔北齊皇建中平州刺史嵇暉建
議開督元舊陂歲收稻數十萬石北境賴以周贍此
其驗也督元在今新野縣界

論大作水軍事狀

征進舟師固未嘗闕然可大作一軍召募兩淮黃河
上下等人并南人歸順者兼用其力舡艦一依宋法

精選大材使之專習水戰建以龍驤樓船之號歲師出水陸並進亦多方悞之之法漢武發會稽歐之策也內則浚木液池造爲輕舟令武衛軍不時習又武帝伐西域而鑿昆明池魏祖之征荆吳許西湖是也

論削去科帖俸名

民間科帖標注俸釵且賦稅從古有之必斂之以給祿養是恩出於上今者名之科帖曰此官也是民自以祿食廩給非出國家公養太恩令削去所謂民可使由之不可使知之也

論撫治川蜀事狀

宋人以川蜀號爲左臂謂其控制荆吳上流恃

所重者迄今奄有垂五十年殆天之所以資國朝也。比年以來雖行臺院然未聞境土外拓口內增蓋。經畧撫治未得其人故也。以某愚見若有能招集流亡和誘諸恙訓農積穀通商惠工興起伏利撫存遺黎文武才幹忠義方畧者擢以不次許於要害城邑令一切從便行事自非邊城可併者併其差稅課程權閣三年行有實効使世守其土外據諸蠻君長如能率衆內徙亦仰依上施行軍前虜獲生口不許贖賣將_有婦及男女成丁者配合作戶官爲給田每歲量納本主稅石如此待以歲月完實富庶以俟他日順流東行之舉猶愈守駐寨柵崎嶇山谷間徒費錢糧終無所益取困弊而已

論普加諸王爵號事狀

古者封爵或以土地或以勲賢然徃徃遙領不有其
士未若我朝天恩曠蕩均同雨露實有其封以供湯
沐其未加王號者合無推恩普議及依制頒降印綬
使名實兩全以篤親親之義

論戰士有功遷加官賞事狀

士須以氣作氣因利以銳而官爵者 國家之厚利
也故以加級奏遷使兼今後軍前一切戰士克敵有
功者合無驗所獲首級用誥勅遷加散官以作士氣

論西川軍役事狀

西川軍人俱係山東河北山後九計逐年取要氣力
徃還五千餘里比至屯所鮮不困乏求其精銳不可

得已所謂強弩之末不能穿魯縞也近聞平樂軍人
已蒙替罷至於其餘軍戶合無一體定奪亦同仁一
視之義也

論禁庸醫事狀

國家以民爲本五福以壽爲先今民間庸醫及僧道
筭人妄行鍼藥民愚無知一旦委命於手至有父殺
于前子夭于後終不覺悟是庸醫者猛於苛政也以
其愚見除係官名家者流餘者宜漸行禁記曰醫不
三世不服其藥此之謂也

論監選典故事狀

監選故事吏部將受除負數及擬定州縣名職並自
付之監察本官但憑數臨視而已若中間或有資歷

先後品從高下及不應等事許本官陳告御史即推
究根因與之改正今者監選合無依舊例施行付之
吏部以爲定式

論置官吏空行簿

天下重事無重於州縣得人果得其人臺司何憂
清州縣何憂不治今按察司既立請中書吏部具
州縣見任官吏姓名爲空行簿所至州縣先暗行躡
察然後遍見官吏一一詢考政績得其公廉勤幹者
明注實狀於簿其衰老無能顯有不治之迹者以朱
書書之其有中之才雖別無奇効亦不至敗闕者以
墨書書之又有雖是常才能專長一事亦以朱書
之還臺具奏以聞然後付之吏部使陞黜補充之際

可以坐見群吏賢愚能否不遺一人則天下之才昭然可得矣

論益都括出新戶事狀

益都路括出新戶不下萬計俱係貧難老疾分房驅
丁攢合作戶今秋又值水災比之他路重致困乏若
向前科差必避匿遠竄不幸更值災傷展轉流死別
生事端非國家之利也以某愚見宜令按察司從
實檢覆果堪戶計猶宜存恤其不成戶者並聽作貧
難收係侶爲安便

論品官得上封事狀

五品以上文資官如遇赴闕投除據所管路分內
有利病當興除者得上封事以聞其條件大不過三
小者五事而已正本上中書省副則呈御史臺庶望

下情得以上通而無壅滯之蔽非唯少見人才優劣亦且知任內有無盡心勾當

論立國子學事狀

切見 朝廷選近臣子孫聰明者付之省部閑習政務或授之儒生誦書史有無立國子學使學士院官及選通達政務一人專領其事

論嚴禁好細事狀

方今宋人規畫止是內嚴城守外用慎謀遂得事情預為備禦故師出不能大有利益以某愚見急當禁絕人入境將沿邊地面令軍官上下分掌不時巡邏萬一透漏其當該人負同知情治罪

舉閔仲修事狀

詮選刑名最為重事先為選法未詳已擬丁某克負外郎勾當其刑部亦宜選用舊人整理審定切見在都閔某係前朝刑部今史練明法律通達堯史年德俱高宜蒙錄用不然取宋故事立審刑院使掌理其事

論交參戶土著事狀

交參漫散戶計本管上司差設權府提領招撫總把之類另行管領中間不無侵擾使失業貧民轉致困弊今後但此戶計合無令見任官司收係上着元籍路分推送除豁

論立聘財事狀

男女居室人倫之大者也比年以來聘取無法妄增

財幣使貧家失娶嫁之時今後合無酌古準今定立
常數慶望內無怨女外無曠夫

春旱請雨事狀

古者龍星見而雩雩者四月禱雨之祭也即日已是
立夏氣序乖和暑炎驟作全體訪得自彰德迤北至
都去冬無雪經春不雨二麥已枯春種未下至於大
興部內雖雨降數次多者不及二寸切恐蝗旱反成
災沴民事之急無重於此據隨路闕雨去處合無令
有司擇日行雩祭之禮為民祈穀其於農政實所先
務據此合行舉呈

論倉庫院務官除授事狀

舊例倉庫院務皆係流外官除授今者一出入人情賄

賂其以賄得者取倍常為恐其以情得者務賂遺為
事以致徃往失陷賊濫而敗曾无愧惜今後合無依
舊例據見勾當人負定立資品依格遷叙使人人以
功名為心其弊不革而自去矣

論監選事狀

欽奉

聖旨條書內一欵節該應合遷轉官員如任滿不行
遷轉或遷轉不依格者委監察糾察仍令監選欽奉
如此近委某監選伏見中書省奏奉到

聖旨中統三年無脚色官員盡行委用據告叙承襲
等事省劄亦有定例其一切求仕官員各有自來根
脚及本路總府保中文解所當問者升降不等資品

不應遠近失當言出事定皆在擬注之際今者監選
止是引驗臨視解由文字中間鈐注窠闕是否何由
得知若已除人負儻或不應有告言者臨時難以折
辯亦恐臺官恠問又知得第一選係監察梁真監選
將解由人負讀視外驗及將擬定窠闕亦令看讀今
某監選除讀視解由引驗人負外據擬定窠闕不令
看讀若不呈覆緣今日格法日新某等監選亦不當
守常而不知變至如亡金故事亦是監視注定名數
其間公事若有違錯即告監察與之改正又念今日
最害事者以情破格以私害公照得欽奉

聖旨節該仍令監選思忖選者一選之事豈有知其
前而不知其後合無依第一選通知前後事理俾望

中間不致違錯據此合行呈覆

論舉官自代事狀

切見內外大小官吏務保祿位鮮有以廉耻自厲者
正似庸工計日取直縱有強幹亦為薄俗所移欲求
其公勤忠義竭力以報上者不可得已其道正須
尚廉取獎忠勤抑僥倖進恬退如樹私黨取常格叙
故舊等事皆宜杜絕今後合無令內外五品以下至
七品官比及考滿中間須得保舉所知有才行声跡
顯明者一人以自代令按察司覆察才行確實由臺
呈省聞奏如不相應彼此俱罪之其舉官在任內或
有故及任滿闕員即令其人補充茲蓋帝舜九官相
讓之法唐朝因之亡金亦嘗行焉今之天下猶古之

天下行之于今何獨不可但二三大臣主之當力耳

論修起居注事狀

宜令學士院脩起居注逐旋進讀後置起居舍人郎等官使分掌其事

為收復連海事狀

專委東路統軍司據元曾攻拔連海將士人負令陳說當間方畧限以年數專為收復以窺海道入揚州之路

論定興隸屬涿州事狀

切見定興新城爰自亡金係京畿屬邑况根本所在勢無大重合無改正復隸涿州

論服色尚白事狀

國朝服色尚白今後合無令百司品官如遇天壽節及圓坐廳事公會迎拜宣詔所衣裘服一色皓白為正服布告中外使為定制

論百司吏負並懸書袋事狀

在都百司吏人實數有徒服色既無以別察者又不復知以致往往輕犯禁令今後有無取舊例令吏負等人並懸書袋

論州縣闕解字事狀

州縣見闕解字去處宜官為起蓋使有定所及頒降戒諭聖訓書之屏風使朝夕仰視知所懲勸

論器械有常課事狀

器械貴堅強犀利非限以歲月不能如法西漢至昭

宣帝間兵甲器仗方得精粹合無隨路置局以常課
造作物勒工名以考其利鈍令達魯花赤不妨本職
監視成造每月開申功程次第上半年輸納京都
論褒獎公能廉幹事狀
隨路府官有廉幹政声自民間達
聖聽者宜降德
音特加旌擢

論密院置學士事狀

樞密院宜取唐故事置學士一員選六十已上通達
古今曉暢軍事及明時務知地理儒者克之以備顧
問參謀議或有可否許以專達

論今後師出不拘常限事狀

今師出不可以秋冬為期宜出不意使蹂踐田苗不

得耕稼以成彼邊困弊之漸亦克國伐卷李靖破梁
之策也

論州縣檢括僧道事狀

州縣宜檢括出家僧道不上着等人有以妖術惑
人衆及造作偽金銀者痛行治罪

論均平秤尺斛斗事狀


書云同律度量衡帝舜所以資治也今民間升斗秤
尺有出入之異往年雖有禁令有司戒裂竟莫曾行
今後合無製造法物官為印烙頒降州縣一體施行

論軍官以功贖罪事狀

軍官之罪重積如北宜許以邊功自贖以攻城畧地
伐謀用間為上以斬將奪旗為次餘驗所獲首級使

相當其冒名影替之數古人所謂使功不如使過是也

秋澗先生大全集卷第八十六



秋澗先生大全集卷八十七

烏臺筆補

彈順天路總管祖世傑不合支俸事狀

照得尚書省劄付節該今後官吏辨證私罪但離本職其祿不給承此今體察到順天總管祖世傑於至元七年二月為道大言語公事尚書刑部勾喚本官前來歸問至當月十七日到部至至元八年二月二十二日才行還府有本官却將正二兩月俸秩於本路盡數閔支了當事屬違錯合驗曠闕月日於本官處依數追理施行

論借貸飢民米糧事狀

切見益都淄萊衛輝洛磁等路農民因連年蝗旱闕

乏餓糧自去秋至今春刈食草木至結死中毒病腫
自縊死者幾於百人其壯者迫於飢寒往往去爲盜
賊外據見關食者密州萊陽等處二萬七千餘戶西
京一路三萬餘戶上下累申前後十月才聞尚書省
將三路飢民分間約量許貸米糧接濟却令今秋還
納而上年但此等事依例催徵欠數參詳極有未當
者夫張官置吏本以爲致如爲郡縣者承流宣化牧
養元元爲本主監司者以按治懋察問民疾苦與利
除害爲務且救荒守臣職也今坐視民飢大失所天
至於此極不敢權宜畧爲營救方循守常例行移申
解經由官府數重至於再三尚不獲請即救其轉死
溝壑之禍誠可痛也又慮任內戶口流散別致違錯

虛言安諭隨以隣佑團甲保結不使東西就食它處
苟延朝夕以致殍餓死亡逃竄如此是上慢下殘而
與有司殺之何異使監司管民等官當位食祿何類
安處民上而以牧養興除爲治哉夫邦以民爲本民
以食爲天宰相者代天理物下遂其宜者也今民急
如此理合以哀痛爲心猶已飢溺開陳事宜作急聞
奏使

朝廷曉然知利害所在大發倉廩寬貸鹽法或停罷
夫役蠲除差稅重如惠恤以賑濟撫養爲事庶可以
上副

聖主天地雨露之恩仁民愛物之念不務出此視爲
細微方以借貸還官爲事所謂聞荒不救見饑不驚

者也兼所在為糧多有名無實切恐虛行了無所濟且近年已來為百姓貧乏省部雖差官賑濟止是營救一時不見遠有安濟弭盡之方以至於此如西京一路見闕食者三萬餘戶今許借貸米糧倉廩二萬石約戶給七斗家以五口為率日食二小升是僅能支持月餘燕山後地寒霜雪早至設或天災依然二月之外不知復何存活而秋田又無所望此又當憲者照得前宋時每遇水旱飢荒必選摘京朝才幹重臣以體量安撫為職其一切規畫悉以便宜從事如富弼之法青州韓琦之救利益前後所活百有五十萬口足見規為有方雖多益辦况二二萬之衆乎又檢會得金監司條例遇災傷闕食去處有能以物贖

濟困窮與民興利除害者按察司保申

朝廷約量旌賞錢遇有此等事理許令守臣從長規畫營救更乞將已借米糧即充賑濟之物外據上年懸欠舊稅截日住徵其於官民兩得便濟其今當去職有見不言寔為負責合行一就具呈據乞

御史臺照詳

聞奏施行

舉李戶部稱職合特加寵數事狀

切惟財賦天下之大計民部六卿之劇曹昔李唐一代以調度見稱者裴劉二公而已切見戶部尚書李德輝資稟忠純精詳政體夙夜在公克盡所事而又疾邪持正吏不敢欺愛自歷職已來寔為允稱可

謂蹇蹇匪躬盡瘁於

國者也近聞尚書省亦以喉舌得人

不許改充別職誠然照得唐例如裴劉諸人於度支

鹽鐵本職上帶中書門下兼同之稱

據尚書李德輝官資祿秩理宜特加寵數

顯異良能以慰中外之望而當國者且復塞進賢之青矣

烏臺日事

自至元五年冬十一月終至元辛未夏四月

請舉行科舉事狀

切見科舉事理往年翰林院已經具陳中書省乞

聞奏定擬頃者尚書省亦下禮部復有講究條目至

今未聞施行蓋未有度其事宜而力為言者伏惟

朝廷凡有大小均當

聖意每云尋好人者且好人者大槩解官事識廉耻

以公滅私不作過犯之人若科舉事行必須先立學

校或人人力學學校者國家之化原人材之大本

也但自教育中來人終是通古今解公事知廉恥識

忠義鮮過犯如此豈非好人歟由是觀之庠序科舉

以之育材取士最為急務理合舉行兼自立銓選已

來內外郡官其品從散官俸祿職田子孫廕叙其為

寵數亦以不薄至於功能陞賞之科過犯降罰之例

又復備具蓋所以磨鈍礪世欲官得其人以致理

故也然取人之道未覩其由應選之人歲有定數謂

如目今隨路府州司縣見設正官一千五百餘員槩

以中材較之其實良能著稱者少又中間身故老病

因罪黜罷及闕負去處每歲極多據格法之外雖有
 適用長材又不敢在法參注一人是應選常調之者
 不數年所存固無幾矣若科舉取人之法於此不早
 詳定是猶工巧者得製錦之方而無錦可製將何以
 就裘服之功乎又如儒人戶計委係深通文學者依
 例免差若此科不立恐不能竟別是否使委通文藝
 之人終身不被其澤而又無路可進得展實用於明
 時誠可惜也以此參詳科舉為法以之取人寔為公
 當故歷代因仍雖格制異同終不能少廢此明驗也
 鴻惟
 太宗合罕皇帝聖模宏遠戊戌年間以程試之法畧
 為施行當時翕然向化所得人材不少據設科事理

既係

先朝已行故事理宜追述

聞奏定奪施行如此則上可以副

聖主求賢致理之心下庶幾多得人材大補銓選內
 外百官之用不然人情急於進用勢利所在僥競成
 俗若此風一煽治道無由而隆風俗因之而靡尚何
 選法之有哉故時政所先莫此為重秉
 國鈞者宜深思遠慮預防其將來之弊則天下幸甚

論職官公私有犯不聽收贖皆的決事狀

古者刑不至大夫禮不及庶人兼爵祿者所以待材
 能廉耻者所以厲節行此自古之常法蓋斷不可易
 者今訪聞得尚書省奏擬到將一切內外職官如公

私宥犯不聽收贖皆以的決論罪甚非待才能而屬
臣節也如此則是有司教人以頑鈍無耻集詬之節
廉隅不立而當職任者既無貴貴尊尊之義且以官
徒自處苟日計庸而已假如外路一州縣官聽斷民
訟其或無理者必諭之使退彼執迷不聽至於再三
官偶以怒詈遣出民必曰汝雖無私罪猶得以辱詈
爲公罪是當官者手足無措爲小民者恣得羅織矣
兼目今官弱民強例以侵侮把持爲事若此法一行
官府決不能立上司亦不復制矣論者必曰相臣得
罪且受杖責此何所措是大不然夫相臣受責出人
主一時權斷舊例即非求格體制不得引爲後例
今欲以的决施之天下必將爲常行格法所謂非常

之論民必懼焉恐此言一出斷不可訓徒傷天地之
恩爲

國家欽怨之舉耳據此合行糾呈

論重刑決不待時事狀

切見中統建元詔內一欵犯刑至死者如州府審問
獄成便行斷决則死者不可復生斷者不可復續案
牘繁冗須臾决判萬一差誤人命至重悔將何及
朕實哀矜今後但有死刑仰所在官司推勘得實親
情始末及断定招欵申宣撫司照詳宣撫司再行審
覆無疑呈省

聞奏待報决斷至今依上施行理實允當此

聖主天地好生之大德雖堯舜無以踰此今訪問得

朝廷諭尚書省今後合打的便打了者合死的便施行者省官回奏云已前重刑待報候秋分後斷決爲這般贖下多有便似淹禁一般今後至如首部問了監察重審無冤不待秋分逐旋施行呵怎生

聖旨您道得是一般所聞大槩如此設或在京者能然外路何以區處卑職叅詳刑者例也一成而不可變故君子盡心焉謂如明白重刑其正犯干連賊仗准服追勘審覆結案須經歷官府數重少者不下半載之上不能一切完備尚慮事情始末恐有差疑人命至重或致枉錯有傷和氣故舊例重刑不限催舉待以歲時欲於三覆五奏之間脫有冤誣庶正犯敗露不致濫及無辜以極哀矜欽恤之意免不嗜於速

殺也至於秋分後行刑蓋自古

帝王體天行道以順四時生殺之理此又大不可恃也如舊例決不待時蓋所以待惡逆以上罪也今者

將一切常犯死罪者數月之間案牘稍具止令省

部監察審問無冤同惡逆罪犯決不待時雖皇陶在

上保不能曲盡獄情一無冤濫全畧舉近年北京高

幹忽乃婿銀延壽奴將隨逐妻家駭男長壽轉賣上

都民家在後事發到官以殺害駭男自誣又經

中書省審刑官審問無冤至將延壽奴作死罪斷訖

一百七下及將妻高氏離異既而駭男以親書達于

本使乃知本人誣服本道按察司方爲改正以此叅

詳捶楚之下何求而不得兼法者天下之公共非倉

卒奏對間所可擬議伏惟尚書省總持紀綱號令天下民之大命繫一言安危誠當審量事宜集議允當可為求格者而復更改

聞奏以救既往則天下幸甚據此合行舉呈

高唐州州尹張庭瑞稱職事狀

今體得高唐州州尹張庭瑞自到任已來甫及暮年五事可稱一方受賜蓋其人強幹有為廉能素著凡所與除率先律已如待僚佐以禮束胥吏以法勸課耕桑裁抑游惰宣明教本則首興學庶拯齊羸多則課習整流井井有条吏安民便而又曉暢軍機勇於臨敵向軍虎嘯已肅邊聲今尹齊西號稱治最誠有用之全材一時之良大夫也理宜

聞奏擢置監司不然百里之地不能盡其所長為可惜耳據此合行 呈

請立登聞檢鼓院事狀

切見一等狂妄小民苦無冤抑如婚姻田宅戶門等事往往輒便接駕唐突

聖主愛民心切以為事重致使

聖顏未嘗不為之動其唐突者必奉將

敷旨令有司理問然後退去則是

萬乘帝王之尊下行有司之事萬無此理臣下不能駭懼合無建立登聞檢鼓院如有指陳軍國大事朝政得失大段冤抑累經訴理未獲辨明或事不機密者許令投進以

聞如此使天下冤抑之情得以上達而朝廷尊嚴之勢彼狂妄小民亦不能咫尺輕近矣

論立司諫等官事狀

蓋聞朝無諍臣則不知過國無達士則不聞善於諸侯卿大夫士廢人皆有諍臣諍友則國安而令名可保矣况

萬乘之帝王數伏見

朝廷近年以來雖或事小情有似重者

天威震怒出於一時輒至不測欽惟

聖慈隨復追悔以至有云當問如何無人題奏來所聞大既如此今憲臺雖立或有所論執卒不能上達得開陳利害於前合無選近侍重臣輔以剛正儒者

使為司諫等官如此則

聖益聖而明益明且免夫既往追惟之悔天下幸甚

論職官子孫試補省臺院部令史狀

照得舊例

皇家總麻以上親及曾任宰執之子聽試尚書省令

譯史

皇家袒免親及宰執孫并弟若三品以上職事官之子弟及終場舉人聽試臺院令譯史其散官五品以上職事子孫兄弟及姪或散官不及五品曾任五品職事子孫兄弟皆聽試御史通事切見

朝廷近年將大根脚官員子孫分付都省臺院習學政務此政前代宗室宰執官試補之意也至於

宗室子孫不敢輕議如宰執職官子孫弟姪理且舉
行蓋宰執職官子孫弟姪終是有門地大相脚中出
來人其所聞所見無非宦體時務有所顧惜且不急
於財賄此輩可取者今後合無酌准上項格例限以
歲月試驗克堪相應之人令於省臺院部與吏員相
參勾當寔為兩有便益且吏員職掌文字皆係
國家庶務刑政機密動關利害自非守慎公幹者鮮
不害事若以宰執職官子孫相參勾當驗事務輕重
上下分掌使逐互環磨長短相補持體倚辦各有所
司豈非兩有便益者哉為吏員者漸磨既久務知遠
大聲迹漸好易其鍛煉積習之心為子弟者通曉政
事一適於用革去驕惰後靡之氣不數年使

朝廷之上備任用者比皆良能公正閱閱素宦之人
將見私已門下僥倖泛濫之弊不革而自去矣

舉都事馬甫并選用儒者事狀

切念臺之為司不同省部職掌上所以肅

朝廷之紀綱下所以正百官之邪僻至於軍民利害
刑政得失皆得糾而繩之故一臺綱領必須擇得其
人使內外官府動或過舉則田有某人在恐不宣然
可也又古者用人唯出至公雖父子相舉兄弟同臺
官府有舊皆不以為嫌如或不才抑濁揚清正臺司
之職耳切見都事馬甫性詳靜閑吏事凡所論議務
先大體以儒飾吏者相參勾當方為允稱不致事務
差謬為外望所易

論陳提刑改除不宜取解由事狀

伏見尚書省奏擬山東東西道提刑按察使陳祐簽
中興等路行尚書省事就令本司取無粘帶辭由前
來參詳見設按察司五道據祐忠真剛果毅然有為
脫畧縉務明大體凡所興除民安吏畏風教所加百
城震肅以聲其迹比量氣為稱職兼山東東西阻山負
海地廣物衆連年蝗旱軍民不安所仰祐等以之鎮
靜今祐所除名雖相列其寔左遷若向前代官苟非
其人是一道監司殆虛設耳憲臺理合開陳可否以
之執奏別議選注外據取解由一節照得舊例九省
除官倒除者止是給據別無取解由休例且按察官
係朝廷耳目之使以按劾彈糾為職不同州府掌

管事理今也齊同有司一例取解由赴省似為非體
乞一就定奪據此合行舉呈

論五品以上官殿授事狀

訪問得舊例五品以上官得除者殿授皆奏謝六品
以下官於嚴祇門授而無謝禮今者內外大小官負
其宣命勅牒皆於中書省祇受似有未當者且三
品至五品官僚職掌雖分內外俱係
國家倚重臣子而

朝廷誠不可不察視其人之邪正能否也昔太宗將
都督刺史姓名疏於屏風欲坐卧觀覽得善惡之跡
注於名下以備黜陟至玄宗將已除職官延之內殿
詢訪治道然後諭遣至人人感激莫不以名節自奮

故真觀開元之治號稱隆平今後合無將五品以上
官員盡令 陛見祗受

宣命使人人躬被

恩寵於朝抑且革去僥倖非妄之徒外據六品以下
官員且於 中省祗受權宜門授之制如
殿庭定立然後別議施行

論貧難軍合從所屬定奪事狀

切見天下新舊軍丸極有生受難以應當者如貧難
年老單丁女戶消乏者是也至如剗簽軍人近年上
司畧行分揀難易不堪者却行收係為民二千餘戶
况在前年分舊軍中間年老單丁女戶消乏貧難數
多獨不蒙分間優恤何事情一躰而舊軍偏重如此

蓋有司之不省故也其家可傷者如貧難等戶往往
陳告經年累歲了無投向如告到總府府司止備申
兵部部即曰非我當問即行下令中合屬本路依准
申覆樞密院院即曰我主調發但恐關少正數而已
仍散押入案亦別無定奪參詳雖使貧難軍人無所
控訴而軍前氣力亦不濟用是軍力人難上下既無
分辯兩相耽悞今畧舉懷孟路舊軍李用姚三秦義
等三名俱各單丁年八十餘歲無人俱給日逐營
乞食應役向申樞密院不蒙明降其義近於軍前
因病身故本路又將李用等三名申詳兵部又行下
令申合屬別無定奪此明驗也今檢會到唐制健兒
在軍皆有年限更來往額為勞弊又諸軍鎮量閏劇

利害置兵防健兒於諸色征行人內及客戶中召募
取丁壯情願者克健兒常住邊面者每年加常例給
賜銀給永年優復其家口情願去者聽至軍州各給
田土屋宅人賴其利中外獲安是後州郡之間永無
徵發之役又舊例諸軍健年六十者罷役如秦義等
八十老人使之守戍禦敵何所賴其勇健哉今後合
無應貧難軍人陳訴許從合屬受理定奪勘當的實
唯復寬減差役或別議優恤庶免致靠損人難進退
無據不然請依分間新軍體例將貧難極生受者亦
從長定奪似為安便外據闕少合補之數官為召募
情願者聽仍優復其家口遇有戰功普例給賜如此
可以收壯健而活疲民其為惠恤小民豈不倍於尋

常萬萬也據此合行舉呈

薦臺掾趙文昌事狀

切惟臺之為司以禮法繩官邪用儒術飾國事近世
已來文學之士專上才華少諳吏業一旦從事解充
有為苟有盡心誠可嘉尚切見前濟南副提學趙文
昌自為臺掾強幹有緝夙夜在公精研政事以儒有
飾吏之材養氣負嫉邪之志求之等倫誠難多得今
去繁居簡明見甄獎若臺司將來闕負如文昌者誠
宜擢用必能不負所學克堪所任儻升霜簡之流尤
勵素餐之者某今當去職有見不言寔為負責據此
預合薦明

舉左丞姚公克經選等職狀

伏惟

朝廷凡有大政大議必須

清問故老茲蓋詢諮黃髮恐有所愆之

盛意也切見前中書左丞姚樞

潛邸舊臣中朝大老生平以聖學爲心輔政多嘉

謀入告近簽南省爲衆牽持罔伸所懷今年雖耆艾

精力未衰謀猷論議足有規爲未宜閑退使後事功

至於侍講經筵監修

國史保傳

儲闈承旨樞密寔能克堪負荷必能進盡忠嘉有所

廣益兼翰院集賢等員如

許寶二公者已蒙

恩眷如有此體例合行舉言者伏乞

憲臺詳照施行

論衛輝路不互通管竹課事狀

切見衛輝路見管竹課據所該地面懷洛嵩汝唐鄧
徐邳益都泰安等處自方萬有餘里其實難以勾赴
今止令衛輝總府並隸管領恢辦課程不致虧兌失
誤叅詳極有未便者蓋衛輝路分微小當四衝驛程
民訟科差諸軍輿魯一切課程等事比之他郡百倍
其劇今又將諸路竹課並令管領雖極慮盡心勾當
決有力所不及去處又緣竹雖官貨寔係經商交易
不同商稅認辦宣課事體至於斫伐以時般運有法
價直低昂使官民兩便自非通知貨殖善於理財者

鮮能首尾相應彼此皆辦兼上項有竹地面必須差設監司巡竹等官吏又令聽受本道節制前去各路營運其間交關往來其路分既平牒衙門而監巡皆差委客寄少有蹉跌輒成阻阻與其廢力如此何若各令所在總府兼行管領以為長便又照得濱樂清滄解塩依舊專設司事恢辦合無將上項竹課亦另行設立監司同塩場一體管領勾當廢氣力專一終是易為責辦今省部若不如此從長別行定奪將來衛輝官府不惟因此負累其所辦課程儻有虧兌失誤深係利害據此合行舉呈

儒士楊弘道賜號事狀

伏念高尚之士無代無之

國家必遂其素志賜以處士先生之號蓋其材學節義可高足以勵薄俗而敦風化故也切見益都路者儒揚弘道文章德業師表一世至於賦壇頻年徵功經營海道欲遂奸計先生預有所見發為歌詩聲言不可今行年八十有三窮者守道垂老丘園誠天民之先覺清時之隱逸也合無照依葬靖李公

恩例乞

賜處士先生之號以表其廉節且令本路歲時常加存恤

請職官依舊三十月遷轉事狀

切見即日到部聽除職官緣負多闕少填積停滯人數以致進退兩難有礙銓調但失才能樂於從政之

望深有未便者至如

尚書省奏准令大小職官皆以六十月為一考蓋出一時權宜本為收拾力計等事恐考限短促中間不能盡心勾當而已近聞隨路戶口事理已是檢括版籍見數別無隱落若止擬六十月成考歲月既久則官府人情不無厭急輕易之弊又於選調有所窒礙據時之制估宜復舊合無聞錄依舊例以三十月為滿考選調無得通行廢官免致閑曠實於官民兩得便當

彈劾劉汝翼狀

今體察得中路教授劉汝翼今月初七日於崇孝寺與提學楊榮因議事間用言侵犯遂將楊榮輒行毀

詈及攬捩鬚鬚至於脫落却行私下勸和叅詳教官維為人師行中士表宣明教本訓導生徒為任其劉汝翼凶悍荒酷凌犯官長為細人所不為既傷儒風大夫士體使京師首善之地何所矜式宜遴選師儒以代其職據此合行糾彈

論隨路關負及未到任官負事狀

切惟張官置吏本以為民官得其人負不曠闕庶得民安事辦今體察得隨路見關總管八員正從七品二百七十餘員兼州縣省併以來所轄地面極有寬闊去處加以蝗旱大作民心嗷嗷似為未安况兗兗平陽太原濟南等處皆係重鎮尤不可闕負勾當合無遴選才德兼備素為

朝廷所知者擬注總管及州縣被災重處貪闕多者
省部從長講究於見守遠關官內選摘或令內外五
品以上官辟舉舉幹相應人借注補充勾當又知得
四月中受除官員已踰兩月尚有未到任者五十餘
員亦當作急催督別議究治不然切恐中間規避致
悞一方事務又於
國家法制有所蔑裂合行一就舉呈

為起蓋良鄉縣南留里河橋梁事狀

會驗中書省條畫內一款該若有利害可以興除者
申臺呈省遵此切見中都迤南係四方官負客旅
朝會經行驛程正路近體知得良鄉縣南十三里有
舊來經由留里河橋官道南至涿州六十里兵革以

來橋廢不行日今靠西由繼陽套遠轉至涿州七十
五里若經夏秋河水泛漲泥濘虛陷致使鋪馬客旅
來往生受兼繼陽套地形卑下村坊遠窵接連葺會
屢常失盜深為未便竊詳若依舊起蓋留里河橋道
不唯道路高平徑直使鋪馬客旅往返近三十餘里
又免水潦泥濘之患官民寔為兩便伏乞御史臺備
呈中書省行下相視改正施行

益津縣尹張英非違等事狀

今察到益津縣尹張英自到任已來甫踰兩月其逐
節非違為私蠹等事開具于右據此合行糾彈

一縣尹張英到任至今兼掌尉印凡失盜二起
明有窟穴顯跡不即督勒弓兵嚴限緝捕

却為擗問失盜李鄭二家親屬及勒要訖
事主王伯英自願不行申告文狀其從盜
盜賊以有為無匿而不申度其主意止恐
不獲停罰月俸本縣民心因此失望其張
英字民之官務在肅清所部盜賊消弭方
為稱職今所行如此非唯違錯寔為以私
減公

一前益津縣尹張文郁主簿李璋使訖益折粟
鈔三十餘定其張英明知前官侵使官錢
不即依理舉問又不止約本官申明使州
知會於九月十九日反行送出還家去訖
及發下馬馳一千餘疋已悞料粟纒於十

月初十經隔二十餘日不由所管上司擅
自赴府而越言上說稱前官張文郁並不
交代往豐聞去訖乞勾追發下依理交代
及總府退訖月申縣解却就都於州司吏
李讓處詭取本州空解依前申覆切詳上
項事理非唯失悞支持事屬欺罔詐冒兼
張英係監臨之官知代官有犯故不舉問
送令還家其徇私害公孰甚於此若弗糾
治切恐因而循習別生事端所據前項事
情就問得州吏目王文進司吏呂仲榮與
所察相同

一霸州益津縣分俱該河流陂浸地面其驛程

係山東要路中間津梁最爲急務又照得
省劄修理橋道事明該簿尉闕員委自己
上正官兼管及令長官檢核其縣尹張英
將本縣合修橋道提口畧不省問止委弓
手盧得用管領工役致使人夫逃散冬月
寒冷修疊不能了畢使經行人負罷役城
夫及發下馬馳蕩涉水水人幾有漂沒者
就問得縣達魯花赤舍里甫丁吏目王文
進與所察相同其於公不幹違錯怠慢如
此

一守令百里寄命苟非其人則一方被害其張
英性荒嗜酒昧於事體又乘酒縱暴不居

公解將公使人符首領等非禮毆擊致有
逃避之者及本州行下事理如橋道見禁
等事往往違拒輒不申報至於縣司所行
或不應者典吏報覆畧不聽從恃賴曾為
部掾蔑視上司如委棄尉印令弓手張典
掌管將舍里甫丁私己人烈石立為巡捕
祇待官見於煎茶鋪勾當其恣意亂行如
此致將公務窒塞兩耽非止一事兼張英
前任唐縣其部民告發不公等事上司未
曾歸結不審緣何依前遷除克益津縣尹
勾當合無一就究問

彈左巡院官休和趙仲謙事

今體察得趙仲謙於至元五年十二月內詣中都左
巡院告王四打死妹趙喜蓮事其郝敬侵馬警判蕭
典史提控張仲禮將被論人王四不行撲捉到官及
在都見有干證人亦不勾喚虛調行遣及將潞縣取
發到干連人等並不與元告被論當官對問從放還
家其事主趙仲謙為見巡院故意遷延再行告到
總府并右三部行下巡院其巡院官吏止是依前虛
調行遣並不理問却於今年二月二十日有郝警使
沈警副等當廳公然省會元告被論人等與限二日
勸和了者切見巡院係京畿親民正聽務要禮義興
行肅清所部據前項違錯事理合行糾彈
為添科南京不任差戶事

切見南京路兵興已來百色所須盡出民間如挑河
運糧和買和采採打木植造作船隻器甲等事三年
之間畧無寧息加以蝗旱相仍物價踴貴其被災去
處至今有闕食者而賑濟
大恩又不霑被中外罄罄財殫力困已是生受又即
目亟蠲比之去歲滋省極多近體訪得今歲將本路
新收二萬四千餘戶盡行添科差發頃管不失元額
却緣照得上項戶計內七萬餘戶俱係交參重抄老
疾不任差下戶切恐緣銀一出別致逃竄將閃下差
發必灑於見在戶數可敷元額如此是百姓重併轉
增困敝兼目今襄漢未下攻取之本首仰河南據已
困之民為

國計者誠宜深慮撫摩存恤得小利為易固邦本為
重合無敏依近奉

聖旨減免益都差發

恩例再行勘當堪與不堪從長定奪

聞奏施行據此合行具呈伏乞御史臺照詳施行

為除豁河南屯田戶差發事

切見河北路分新簽軍戶省部將元當燕數除豁了
當今體知得南京路屯田戶計相近二萬方其絲銀
止除訖正額餘上撥下數自却今見在民戶包納即
日本處軍馬調度百色所須民力已是生受更將額
外絲銀數納切恐靠損不安合無依見起新軍差發
一體除豁似望百姓蘇息不致因而重困



為劉古乃打魚事



切見雄霸武清等處魚官劉古乃所管專一打魚人
戶七十六戶每年納魚二千餘頭自去年納至五千
四百餘頭比舊數增一倍之上儘供官司用度今體
知得歲納魚數增至萬頭切詳雄霸等處俱係河泊
戶鹵地面其間貧難人戶別無管產止仰捕魚為生
應當一切差役又兼依例認辦課程其古乃每年於
民間抽分魚貨已是侵擾今來本官為增數及萬陳
告上司將應有河泊盡括屬官禁絕諸人不得採捕
就問得魚戶趙知事與所察相同若依上項所告不
惟下奪小民衣食於

國家賑卹貧難之意大相乖違又兼天地生物有數

三
一
裁取萬頭不幾於竭澤乎據古乃所請理宜裁抑合
行舉呈

秋澗先生大全集卷第八十七





淡月閣藏書
卷之八十七
...

